

Usaha bantu perniagaan untuk atasi pengangguran

PERDANA Menteri, Datuk Seri Ismail Sabri Yaakob memperkenalkan Program Semarak Niaga Keluarga Malaysia bertujuan untuk membantu membangkitkan semula perniagaan di negara ini sekali gus dapat mengurangkan masalah pengangguran.

“Ini merupakan salah satu penyelesaian yang inovatif, dan tidak pernah diperkenalkan sebelum ini. Kerajaan yakin usaha ini akan membantu komuniti usahawan untuk terus maju dan bangkit semula,” katanya.

Justeru, secara tidak langsung, apabila pelbagai bantuan dan sokongan diberikan kepada komuniti perniagaan, lebih banyak peluang pekerjaan dapat dicipta, di samping memulihkan punca rezeki Keluarga Malaysia.

Ikuti wawancara bersama Ismail Sabri bagi mengupas tentang program yang dilancarkan pada hari ini.

SOALAN: Boleh Datuk Seri huraikan dengan lebih lanjut mengenai Program Semarak Niaga Keluarga Malaysia?

ISMAIL SABRI: Program Semarak Niaga Keluarga Malaysia merupakan komitmen kerajaan untuk membantu perniagaan bangkit semula, serta membina keupayaan dan daya saing mereka berikutan pandemik Covid-19, terutamanya Perusahaan Mikro, Kecil dan Sederhana (PMKS).

Oleh itu, melalui Bajet 2022, sebanyak RM40 bilion telah diperuntukkan bagi tujuan ini yang merangkumi pelbagai bentuk pinjaman, termasuklah suntikan ekuiti.

Inisiatif ini juga mencerminkan semangat Keluarga Malaysia, di mana seluruh komuniti usahawan, iaitu daripada perusahaan mikro hinggalah syarikat tersenarai awam boleh memohon.

Akibat pandemik Covid-19, kita tahu yang paling terkesan adalah golongan PMKS. Mereka perlu dibantu, tidak kira dari segi skim pembiayaan seperti pinjaman langsung, mahupun geran padanan supaya keupayaan mereka untuk memulakan semula perniagaan bagi jangka masa panjang dapat dijamin.

Di bawah program ini, kita juga ada jaminan pembiayaan yang disediakan oleh Syarikat Jaminan Pembiayaan Perniagaan (SJPP) berjumlah RM22 bilion termasuk RM2 bilion khusus untuk Bumiputera. Semua ini akan memudahkan PKS mendapat pembiayaan baharu yang sebelum ini sukar diperolehi.

Bagaimanakah Program Semarak Niaga Keluarga Malaysia ini dapat membantu dalam usaha pemulihan ekonomi negara?

Menerusi program ini, kita mahu memastikan negara berada dalam landasan pemulihan ekonomi yang kukuh. Dengan ketidaktentuan ekonomi negara semenjak pandemik Covid-19 melanda negara, kesannya masih dirasakan oleh seluruh komuniti perniagaan.

Kita dapat lihat beribu-ribu perniagaan terpaksa gulung tikar. Tentunya mereka menghadapi kesukaran untuk memulakan semula perniagaan atau memastikan kelangsungan operasi, terutamanya jika ada tanggungan hutang yang banyak.

Oleh itu, program ini bukan sahaja menyokong perniagaan dari segi suntikan modal kerja atau pembiayaan, tetapi juga melalui suntikan berbentuk ekuiti (seperti membeli saham atau memegang ekuiti dalam syarikat) kepada perniagaan yang terkesan akibat pandemik Covid-19.

Ini merupakan salah satu penyelesaian yang inovatif, dan tidak pernah diperkenalkan sebelum ini. Kerajaan yakin usaha ini akan membantu komuniti usahawan untuk terus maju dan bangkit semula.

Secara tidak langsung, apabila kita memberi bantuan dan sokongan kepada komuniti perniagaan, lebih banyak peluang pekerjaan dapat dicipta, di samping memulihkan punca rezeki Keluarga Malaysia.

Ini sekali gus akan mengurangkan kadar pengangguran, di mana kerajaan menasarkkan kadar pengangguran yang akan terus pulih di bawah paras empat peratus menjelang hujung tahun ini.

Kita akan terus membina di atas pencapaian tahun lalu. **Jabatan Perangkaan Negara** dan Bank Negara telah mengumumkan bahawa ekonomi negara meningkat sebanyak 3.1 peratus bagi tahun 2021, berbanding penguncupan 5.6 peratus pada tahun 2020.

Kerajaan yakin usaha penciptaan pekerjaan dan pemerkasaan perniagaan melalui Bajet 2022 akan menyumbang kepada unjuran pertumbuhan KDNK antara 5.5 hingga 6.5 peratus pada tahun ini.

Oleh itu, kerajaan yakin bahawa usaha penciptaan pekerjaan dan pemerkasaan perniagaan melalui Bajet 2022 akan menyumbang kepada unjuran pertumbuhan Keluaran Dalam Negeri Kasar antara 5.5 hingga 6.5 peratus pada tahun ini.

<https://www.sinarharian.com.my/article/188831/BERITA/Nasional/Usaha-bantu-perniagaan-untuk-atasi-pengangguran>